

Sindiket Anton palsukan cop imigresen tumpas

Putarajaya: Jabatan Imigresen Malaysia (JIM) menumpaskan rangkaian sindiket pemalsuan cop imigresen yang aktif di Lembah Klang berikutan penahanan beberapa warga Indonesia termasuk dalam sindiket terbabit, kelmarin.

Ketua Pengarah Imigresen, Datuk Khairul Dzaimie Daud berkata, pihaknya melakukan serbuan di dua premis di Sungai Way, Petaling Jaya, jam 7.45 malam dipercayai menjalankan kegiatan pemalsuan cop imigresen.

Menurutnya, hasil serbuan pertama, pihaknya menemui 39 pasport Indonesia, 12 Surat Perjalanan Laksana Pasport (SPLP) Indonesia dan menahan seorang lelaki berusia 38 tahun

bersama seorang wanita berusia 32 tahun disyaki dalam sindiket pemalsuan cop berkenaan.

Beliau berkata, lelaki terbabit dikenali Anton dipercayai ketua Sindiket Anton dan hasil siasatan Bahagian Perisikan, Operasi Khas dan Analisa JIM mendapati sindiket itu sudah beroperasi lebih dua tahun itu adalah rangkaian sindiket Damrah@Wak Jam yang ditumpaskan sebelum ini.

Katanya, serbuan di premis kedua, menemui pelbagai bentuk *rubber stamp* digunakan untuk membuat cop palsu imigresen.

"Antara *rubber stamp* ditemui adalah bagi membuat

cop keluar masuk Lapangan Terbang Antarabangsa Kuala Lumpur (KLIA), Stulang Laut dan Tanjung Kupang, Johor serta Pelabuhan Melaka," katanya pada sidang media di sini, semalam.

Turut ditemui itu, 28 pasport Indonesia, empat SPLP Indonesia dan masing-masing pasport Bangladesh dan Malaysia.

Seramai 12 warga Indonesia membabitkan tujuh lelaki dan empat wanita serta seorang kanak-kanak perempuan turut ditahan atas

kesalahan Akta Imigresen 1956/63 kerana menggunakan dokumen dan pas palsu.

Khairul Dzaimie berkata, semua warga Indonesia itu dipercayai dalam proses untuk mendapatkan cop palsu pasport bagi membolehkan mereka pulang ke Indonesia.

Menurut beliau, sindiket itu mensasarkan warga Indonesia yang memiliki pasport, tetapi tinggal lebih masa di Malaysia dan ingin pulang ke Indo-

nesia tanpa berhadapan tindakan JIM.

"Sindiket ini juga membuat cop imigresen kepada mana-mana individu yang tinggal lebih masa sebelum bermula Perintah Kawalan Pergerakan (PKP).

"Pemilik akan menghantar pasport berserta bayaran kepada Anton melalui dua lelaki Indonesia lain bagi membuat cop palsu seolah-olah pas itu tamat ketika PKP bagi mendapatkan pengecualian tindakan kesalahan tinggal lebih masa sepanjang perintah itu.

"Suspek memproses lima dokumen setiap hari dan mengenakan bayaran antara RM150 hingga RM250 ba-

gi setiap cop palsu imigresen," katanya.

Beliau berkata, Anton dan pasangannya ditahan kerana melakukan kesalahan mengikut Seksyen 55D, Akta Imigresen 1959/63 jika sabit kesalahan boleh dikenakan denda tidak kurang RM30,000 dan penjara minimum lima tahun serta boleh dikenakan enam sebatan maksimum.

"Imigresen masih memburu dua lelaki Indonesia yang dipercayai terbabit sebagai orang tengah kepada sindiket ini dan orang ramai yang mempunyai maklumat boleh melaporkan kepada imigresen," katanya.

“
Suspek
memproses lima
dokumen setiap
hari
Khairul Dzaimie